

北山小集卷第二十二

信安程俱

外制一

拱衛大夫宣州觀察使劉公彥差同管客
省四方館閣門公事

勅治朝之法諸臣之位詔相獻予之宜所以辨上下
正班爵昭德而別微者也自省方東南典文或闕縣
蕪草創失其故者尚多稽叅古今折中潤色未遑暇
也然率其屬以共其事者亦可不名御所擇哉具官蚤
以世勞荐更器使積官繫伐不專為恩亦既顯融致

位廉察予惟董正朝會賓客禮容之事舉以命尔夫
出入省閤給事左右其任固亦親且重矣惟暨乃僚
恪居厥職惟祇惟名御服我寵休可

朝奉大夫起居舍人候延慶除右文殿修
撰與郡

勅具官右文邃在中祕著撰之職號為高華異時言
動之史出守四方得是者鮮矣尔敏晤文采稱於輩
流慨慷赴功見於已試出入郎省才能益明曾未幾
時簪筆殿陛而以親來諭自詭治民顧宣力之何如
在中外而奚間升華書殿且畀郡符豈惟便尔之私

貞節堂表氏鈔本

抑以成吾忠厚之政服此休命往其懋哉可

九月二十一日三省同奉聖旨朕以眇躬
獲主大器居位五祀而王室益微念茲永
懷慘若焚灼比因宗祀明堂投誠上帝冀
獲悔禍以雪神人之耻而赦文夸大悖拂
朕心方夕惕若又除呂頤浩麻制首為中
天而興聖緒兼創業守文之言徒使四方
謂予有識席益可與外任九月二十二日

三省同奉

聖旨席益微猷閣待制與郡

勅朕以眇躬獲至大器遭時杌隍國勢未振夕惕以
思心焉如灼播告厥旨實在執筆之臣而乃矜功於
肆青之文廣已於求助之際其言夸矣朕甚惡焉具
官夙以言揚見推警敏贊書持橐亦既有年號令之
間宜知國體失辭若此謂天下何解掖垣之近班仍
西清之舊物往有社尚其欽哉可

孟庾除戶部尚書

勅周官以司徒制天下之地征而均節財用者冢宰
宗興以執政領天下之漕計而調度出納者三司繇
茲以來代有因革今則成周之法祖宗之制凡宰輔

貞節堂袁氏鈔本

攸司之守舉而歸諸戶部矣然則為之長者顧不重
哉具官學不泥古才足濟時憂國首公見於華皓高
密之政有循理之稱睢陽之守有扞成之節朕付以
邦計擢之貳卿足兵食於垂罄之餘備典禮於時邁
之際事不愆素官無乏共是用冠以納言陟之常伯
豈徒益觀於來効抑以昭勸於赴功然方今民力已
窮軍旅之事未息節以制度當務所先非予率之以
朴儉無以化谿壑之侈心非爾去敝於因循無以紓
黔黎之深瘝唯民不加斂而國用足則予汝嘉可

知岳州袁植贈直龍圖閣

勅具官廼者盜發江表虔劉郡邑姦凶乘間為長蛇
封豕以肆毒於一方而尔適守岳陽仗正不撓卒與
禍會銜恨九泉今御史列其寃狀與其所以怒寇之
由推原厥初出於徇國朕盡然傷之惟尔詞學之優
才猷之美歷官臺省綽有能聲沒身賊區志士增嘅
升華延閣賚及後昆庶其有知歆此褒渥可

資政殿學士太中大夫提舉臨安府洞霄

宮呂好問守本官致仕

勅太上有立德斯為不朽之圖故國有世臣亦
賢之舉惟予先正貽慶後昆頃致位於燮諧蓋兼隆

御進名

貞節堂表氏鈔本

於問譽速更變故旋即便安遽形告老之言勉徇退
身之志具官某孝悌之美得於天姿重厚之稱信於
士類比中罹於黨錮弥克守於家規靖康之初首被
簡拔亟躋諫省遂總臺綱掌邦政於文昌贊皇猷於
鈞軸肆予纘紹俾復疑丞嘖有煩言寢辭劇職奉祠
均逸既歷於歲時謝事言歸不愆於雅素覽公車之
需奏即秘殿之崇資用以寵綏益全終始庶無勞於
夙夜幾永介於壽康可

秦某與緋章服除直祕閣與郡

勅具官某尔以俊邁策名儒科寄任荐更遂躋郎省

屬尔同氣為予相臣惟合治之相臨援故常而自列
召對便殿悃悃無華敦樸之風見於言貌擢秘以職
錫之身章併示寵綏且有申命夫入為尚書郎出為
二千石乃身在外而名直禁中蓋儒者之榮而當今
之高選也惟克報稱益恢遠圖可

席益差知温州

勅永嘉閩粵之交其俗剽悍以嗇其貨織靡其人多
賈其士風任氣而矜節為之守者非達於政理未有
能成治最而厭與言者也具官學藝之敏稱於朝廷
疏通之才適於權變荐委重寄未之或辭毋輕小邦

貞節堂表氏鈔本

猶足觀政昔吾丘任連城之守而名不稱於在前嚴
助去承明之廬則職已違於侍從惟尔之遇於古有
光尚懋乃功以答休寵可

劉寧止復舊職

勅具官比以輸漕不繼麗于刑書於茲踰年執事滋
恪而相臣交章來上以謂曩者勤王之舉饋饗是共
乃克濟茲以成丕績以功補過誰曰不然朕方搜羅
英才捐弃細故雖疏遠未試猶將熏沐而收之况吾
宣力內外而果藝不回之士乎復職河圖雖云舊物
尚體恩遇益勵厥修可

九月二十三日三省同奉聖旨郭偉依已
降指揮再任

勅具官姑熟江左之重鎮也承平之時号为樂土然
處荆湘之下流據采石之形勢所以通淮南而輔建
業其置戍擇守顧可付非其人哉以尔才力方剛慷
慨自任志在徇國勇於赴功迺者潰叛之徒游魂四
出而尔登陴保聚屢抗賊鋒安輯兵農斯亦勤矣與
其更選於長才孰若因任於已試進職一等還之故
官唯息疲瘵則可以固民心唯謹綏馭則可以奮武
衛克邁予訓尚有寵嘉可

貞節堂表氏鈔本

迪功郎張澆改官

勅具官某惟樞臣浚開濟忠略勤勞王家經營三川
以至關輔朕甚賴之以尔同產之親久從幕府請以
故賞貶尔京僚朕方思勸宣力之臣成乃弟之美豈
有愛於一官乎尚克欽承以圖報稱可

尚書右僕射秦檜封贈

曾祖贈太子少保某 贈太子太保

勅朕思濟艱難以圖恢復眷惟輔相之舉措實繁邦
家之安危斷自朕心既得良弼推慶貽之所自宜錫
命之有加具官曾祖某獨善在躬懷才不試高尚其

事蘭弗服而弥芳文字之祥源既深而益遠種德百年之內收功三世之餘位冠百僚忠邁前古諒儀刑於遺範斯衍繹於流光是用下王綍以寵褒陟儲宮之輔翼庶見著龜之喜以尉承嘗之思可

曾祖母永嘉郡夫人王氏贈崇國夫人

勅朕觀載籍之傳考興衰之緒其流澤後世俾衣冠之盛孝悌之風益隆而不墜者非獨世德之修而已蓋有閨壺之助焉具官曾祖母克以內則相其君子其必有柔嘉之行淑御之儀膳服適於親䟽慈祥足以矜式者矣不然何垂裕之深也惟我次輔為世純

貞節堂表氏鈔本

臣大國加封雖云故事有茲寵渥其命則新可

祖贈太子少傅某贈太子太傅

勅天人之際世或以為難知報施之宜理則疑於可待故有積德不售遺澤則深在其子孫合若符節優隆之典旌勸兼焉具官祖某成性守於宮庭履信行於州里表貴名於異代遠慕王通之著書竦公望於布衣近希文正之憂國朕圖柄任爰得碩臣推循祖德之修實遺邦基之慶惟青宮之高選若師傅之古官用賁家庭以申異數可

祖母普安郡夫人俞氏贈嘉國夫人

勅自漢魏以來至于今者秦氏之世未有顯人而丞相獨以儒學起家忠節自奮致位執政遂登宰司而俞氏之世寂寥千載亦無聞焉夫嗇之久則其施必昌發之遲則其行必遠內外蓄德貽澤厥孫具官祖母惟禮惟法無非無儀化行於中饋仁及於宗姻遂成厥家以有茲慶既疏封於大郡朕以為未足也嘉實大國錫命有加肆寵尔私抑以勸於為善可

父任信州玉山縣令贈太子少師某贈太

子太師

勅官無小大惠足以及物者其澤必長天無私親位

貞節堂表氏鈔本

弗稱其德者其償必厚惟善祥之不爽知義教之有方顧茲褒贈之彛章是亦報施之明驗具官述業該貫提身肅恭自奮賓興之書無愧循良之吏弦歌之用莫究厥施襦袴之仁諒多遺愛密令之為太傅褒賢雖隔於當年于公之啓高門陰德果昌於厥後是用舉封曹之懋典極望苑之崇資以成追遠之思用顯流光之慶可

母和義郡夫人王氏贈榮國夫人

勅士方隱約陋巷棲遲小官刑于室家相與躬顧復之勤保廉儉之操者亦以成其子也子既賢矣展忠

純之節都輔相之位而親不逮養此風木之況古人所以深悲而追榮之典朝廷所以加厚也具官母禮法是蹈淑靖有聞廛身守約既以飭其閨壺矣以子知母則慈嚴之教所以薰陶成就者又可知焉疏封大國庸示寵綏抑以慰孝子之心云尔可

妻信安郡夫人王氏封鎮國夫人

勅二南之詩本於王化之基而及於夫人之德雖形四方風一國小大不同然其所以循法度奉烝嘗致輔佐之宜一也具官妻生于慶門積習名教克配君子禮以自防顧茲翊贊之勲方且延登於揆路豈無

貞節堂表氏鈔本

儆戒之助固當覃慶於閨門太行之東鎮為大國疏封錫命謂之小君時惟懋恩永其祗服可

端明殿學士正議大夫致仕黃裳父贈金

紫光祿大夫文慶贈特進

勅朕嚮者除地廣陵之陽於是始郊薦見上帝均隆四海進遠之贈下及庶僚而况侍從之老出入四朝加寵厥先具有彛數絲綸之出豈有久近之間哉具官父某官潛德不耀晦迹里閭是生時英致位休顯特進二品地極文階以賁九原抑以為積善之勸可母永嘉郡夫人吳氏贈高密郡夫人

同詞具官母云云懿範有煒嬪于德人是生時英致位休顯高密大郡疏封益隆以責九原抑以為積善之勸可

葛勝仲復顯謨閣待制

朕比以月正元日渙發大號紹休之志用以紀年以敷澤於天下凡麗于刑書無以遠邇一皆去累滌垢興之更新而况持橐屏翰出入侍從之臣哉具官某蚤以文學奮於朝廷嘖有煩言久去近著吳興之政民亦宜之還職西清不失舊物尚體恩遇益御厥修可

負節堂袁氏鈔本

梁揚祖復徽猷閣學士

上詞而况屢將使指嘗備法從之列者哉具官某昨總漕輸虜寇大入不共厥職以抵譴訶亦既累年其還舊物恩則厚矣尚克有之可

陸宰復直秘閣

勅具官上詞而况名臣之世嘗備任選者哉尔頃使畿西虜寇大入不共厥職以抵譴訶亦既累年還之冊府尚其靖恪以答恩休可

責援單制團練使副宋暎叙朝請大夫

朕比以月正元日渙發大號紹休之志用以紀年以

敷澤於天下凡麗于刑書無以遠邇一皆去累滌垢
與之更新尔頃以臯度公義弗容屏之遠方庶其滄
省茲緣肆責復尔故官尚務恪恭以荅恩宥可

楊康國特贈徽猷閣待制

勅鈞黨之禍豈不痛哉惟時怙權罔上之臣實始斷
喪忠良以騁志于天下凡元祐靖國儀刑之餘守正
之士傳以大戾舉而納諸丹書朕用盡傷思有優恤
而况殘酷之害被其閨門而天下冤之者乎具官才
業之美奮于昌辰攝貳天官升華書館出入中外時
論具宜遭罹以來殆將三紀待制延閣雖非故官時

貞節堂表氏鈔本

惟渥恩以慰沉抑可

翰林學士汪藻龍圖閣直學士與郡

勅法從之臣居則獻納論思分職率屬以贊朝廷之
治出則賦政共理以致吾澤於民其所以隆體貌之
恩嚴陞廉之勢者顧豈有異哉具官某簡亮通博蚤
以言揚學問文詞推於時雋肆朕纘服推自奉常綸
綍是司出入五載閱勞侍從之務輟嚴助於承明欲
詳政事之宜試蕭生於馮翊寵以河圖之直仍聯學
士之班往奮尔庸副茲睠佇可

吏部侍郎黎確龍圖待制與郡

勅上詞具官操修之美信於友朋學問之優見於踐
歷比對揚之動聽屬諫諍之湏才敷納之言啓沃是
賴旋加明陟俾貳天官雖藉銓衡之公閱勞侍從之
事是用舉河圖之內閣即次對之近班庸示寵章尚
有申命往其祗服益懋乃功可

吏部侍郎高衛龍圖閣待制與郡

勅上詞具官敏疆之實稱於中臺才術之優見於出
使周旋浩穰寢躡高華召自外藩陟之小宰既更時
序益究云為雖藉云云下尚懋乃功可

同知樞密院事富直柔明堂大禮赦恩封

貞節堂袁氏鈔本

贈曾祖任尚書都官負外郎贈太師中書
令兼尚書令追封韓國公言改封魯國公
勅朕觀載籍之傳攷盛衰之緒君子之澤或五世而
方興積善之家信百祥之來降植德之報莫尔之隆
是生經世之臣為國元老及我運籌之佐乃其曾孫
慶賜方行褒嘉可後具官曾祖周才不試厚德在躬
修仁義於奧窔之間委窮通於寒暑之序馮唐老於
郎省曾無不遇之嗟于公大其閭門固有將興之兆
屬均釐於霈澤舉開國之舊章是用冠於五等之封
昨之東魯仍以三公之貴兼長中臺足慰烝嘗之思

亦廣燕詒之慶可

曾祖母韓國夫人韓氏贈魯國夫人

勅天將賚良佐於有邦以為生民之庇則必有休祥之兆若警告於斯人者此尔子之生旂旄導從天赦是承所以發於夢寐而聞於國人者也然則益昌厥後者孰始基之具官曾祖母懿質淑範來嬪德人仁愛之實見懷姻族身孝享養極於顯榮逮見其子出入將相功德兼隆為母如是亦可謂鮮儷矣而慶及四世復亢厥宗國有沛恩肆加錫命改封大國亦禮之宜可

貞節堂表氏鈔本

祖任武寧軍節度使太師守司徒致仕韓國公諡文忠弼追封魏國公餘如故

勅朕仰念仁祖聰明慈儉燕及於萬方永懷宗臣端亮忠嘉功昭于四輔是為不朽施于後昆肆予釐事之成與享湛恩之被具官某祖賢業經世王功在民閑邪責難莫如孟子之事上盛德至善有若武公之佐周措國家於九鼎之安息兵革於百年之久逮茲塗炭之極益見著龜之明宜世濟之有人知慶餘之不爽舉斯寵典表以大名用易國封且俟公位亦何加於舊物姑申命於恩綸可

祖母韓國夫人晏氏贈魏國夫人

勅景祐慶曆之際有舊學之臣曰臨淄公殊以雋德
遠業克相睿明樂善不倦以得天下之英才舉而進
之布在顯列數世賴焉是生賢女作配人傑福善之
慶逮其子孫具官祖母莊靜明淑禮法具宜閨門之
中有叙有愛魚軒翟第命服贊書而居有之以至偕
老朕宗祀上帝敷澤綿區恩數首行於四鄰寵綏上
及於三世無以加厚易封大郡匪唯告第之增華抑
俾有家之知勸可

父任右朝議大夫贈宣奉大夫紹庭贈太

貞節堂袁氏鈔本

子少師

勅朕爰以季秋肇稱禋祀冀獲神靈之佑不替祖宗
之休遂敷錫於四方且推恩於百辟矧輔臣之濟美
知義教之有方顧茲追遠之思用舉彝章之舊具官
父溫恭是蹈揚歷具宜沛然詩禮之無違遠矣德音
之不朽確守先志懇辭官榮是知豈弟之求卒饗蕃
昌之報惟儲宮之二品有訓導之六官莫嚴於師用
以加寵益闡家庭之慶式慰春秋之懷可

母普安郡夫人劉氏贈彭城郡夫人

勅士有砥節厲行克承勲德之世以保其靖共之美

廉潔之操者苟無內助之賢則亦不能成其志也既相其夫以成其家矣又有賢子為吾輔臣寵渥之加則有舊典具官母其承上也順而正其臨下也簡以慈積善在躬以有茲慶屬合宮之大旅均霈澤於多方易彼故封錫之大郡既增榮於存沒亦用慰於劬勞可

故妻齊安郡夫人王氏贈太寧郡夫人

勅先王制禮與夫推恩接下之文未嘗不本於人情也夫相其夫於勤約之中既已躬廉儉而同甘苦矣而不共享其安榮則追贈之隆抑以慰其私尔具官

貞節堂袁氏鈔本

妻賢淑有聞宜其閨門嬪于大家安若素習天關不壽褒賁可忘既疏錫於齊安復進封於大郡用均隆澤以示寵綏可

北山小集卷第二十二

北山小集卷第二十三

信安程俱

外制二

叅知政事李回明堂大禮封贈

曾祖贈正奉大夫祥贈太子少保

勅朕展采合宮肇修宗祀薦見上帝方熙事之既成
敷錫庶民肆湛恩之廣被舉此在廷之籍與蒙追遠
之私矧吾輔臣慶發先世舊章故在寵命惟行具官
曾祖某潛德無瑕懷才不試責報百年之外非此其
身固窮一世之間克昌厥後惟儲宮之二品有訓導

之六官錫以贊書寵之亞保豈惟發幽光之有煒抑以勸為善於無窮可

曾祖母咸寧郡夫人印氏贈武陵郡夫人

勅朕惟祖宗以來慶錫之典每下未嘗不追責廷臣之世者豈徒廣孝道於天下抑為積善之勸為具官曾祖母相其夫於隱約之中成其家以勤儉之行是必有淑恭之美柔嘉之儀以裕其後昆者不然何子孫之多賢而濟美也屬我宗祀敷澤加惠以大賚於士民則輔弼之先寵綏之舊其可後哉疏封武陵是惟太郡用告于第尚克承之可

貞節堂袁氏鈔本

祖任太子中允贈正奉大夫禹贈太子少傅

勅朕肇修宗祀敷錫寰區恩數首加於四隣寵綏上及於三世舉儲宮之近著下王綍以載揚其有修德在躬不渝中盾之秩貽孫有慶亟躋亞傳之崇益顯流光又為特美具官祖靖共厥位豈弟宜民諒多三異之稱見於遺愛卒饗百祥之報以裕後昆有子有孫以孝以享服此維新之命用享不朽之言可

祖母晉康郡夫人姚氏贈太寧郡夫人

勅姚姓出於有虞而李者咎繇之裔也始以祥刑弼

于五教使四方風動不犯于有司以成重華之治陰
德懋焉乃有女子嬪于慶門是生雋臣揚歷從橐以
沒元身而又繼以賢孫流光未艾膺此寵典賁于家
庭具官祖母克以淑德相其君子周旋撫仕通籍金
閨生享錫封沒有加贈逮茲均沛䟽榮太寧豈唯旌
尔之休抑以昭慶澤之遠可

父任寶文閣待制太中大夫贈太師琮追

封襄國公

勅昔在神祖厲精有為凡膺簡曠之餘故多侍從之
老是生賢子亮采累朝屬子大饗以致虔爰始敷施

貞節堂袁氏鈔本

而班慶具官父才猷之邵推重朝廷敏濟之資騰聲
中外出則賦政承流於方面入則贊治率屬於省臺
顧績望之在人宜慶祥之貽後久矣便蕃之典煒然
詩禮之庭既位極於帝師載錫封於公社尚有英爽
歆此寵綏可

嫡母魯國夫人吳氏贈秦國夫人

勅關內大國莫如咸秦古稱小君是亦封爵以彰閨
壺之懿用易龜蒙之詹屬敷澤於多方肆䟽恩於新
命具官嫡母毓秀慶胄作嬪高門禮法宜其宗姻輔
佐成其夫子方者雋論思於法從雖不逮於偕榮而

弼臣寅亮於天工終致隆於追遠賁徽章於綸綍庶有輝於丘原可

繼母越國夫人邵氏贈秦國夫人

用易句吳之邦

上下詞同

繼母燕國夫人孫氏贈秦國夫人

勅上詞同是亦封爵以彰閨壺之懿用示便蕃之恩肆

於敷錫之初式布維新之命具官繼母

云云下詞同

所生母信安郡夫人常氏贈文安郡夫人

勅漢之王符蚤著潛夫之譽晉之周顛世仰忠臣之

門亦惟母教之勤何取外家之盛必有懿德發于幽

貞節堂表氏鈔本

光具官所生母淑

御

有聞温恭不懈實生賢子為我

輔臣屬茲熙事之成咸畀奉先之澤易之大郡表以

嘉名用慰栝棧之思以增松檟之煥可

妻齊安郡夫人郭氏封同安郡夫人

勅公卿大夫積行累功以致休顯夫人以內助之美

而居有之此鵲巢之作所以永言於斯也國有慶錫

有家者與蒙其休則疏封錫命以榮其私者顧可後

哉具官妻以令淑靜嘉作配君子宜于上下其甘苦

豐約之同儆戒相成之際由初迄今勤亦至矣此疏

封之典所以有加而無已也同安大郡以易舊封膺

此寵綏永其祇服可

同知樞密院富直柔加食邑實封

勅朕肇修禋祀祇見合宮刺六經之文嚴祖功宗德之配導三靈之况布籲天請命之誠粵釐事之無違敷湛恩於有截矜予廊廟之輔與相肅雍之成爰有舊章以申寵數具官幾深濟務端亮在躬爰登密宥之司益著贊襄之美運籌決勝方遲子房之功錫祉揚休抑見召公之似逮此精純之辰故多陟降之勞用加衍於戶封且陪敦於真賦既啓尔宇勉思闢國之謀益奮乃庸無曠代天之用欽我徽命永孚于休

貞節堂表氏鈔本

可

知樞密院張浚加食邑實封

勅朕遭時艱虞駐蹕吳越思投誠於上帝肆展窠於合宮創業守文嚴藝祖太宗之配貴誠上質備匏尊橐席之儀熙事告成湛恩遐布矧復鈞樞之重可忘慶錫之盼具官英特應辰幾深濟務忠節著於勤王之際才術見於持憲之初掃除姦凶方懋有征之舉肅清宮闕佇成再造之功用加衍於戶封亦陪敦於

真賦

云云下
詞同富

叅知政事李回加食邑實封

勅朕涓吉季秋薦誠上帝導三靈之况方哀昭格之
休敷百順之祥式布汪洋之澤惟在廷之顯相有進
律之藝章具官建德粹和受才宏敏自延登於廊廟
益有賴於贊襄望之雅意本朝故多鄉納畢公乃心
王室尚告謀猷用加真賦之封且衍爰田之入既啓尔
字勉思闢國之謀

云云下
詞同富

翰林學士汪藻父任奉議郎致仕贈正議

大夫穀贈正奉大夫

勅朕肇修宗祀祇見合宮釐事既成肆敷錫於四海
凡通籍于朝者皆得寵贈其先俾申追遠之志而况

貞節堂表氏鈔本

吾簪筆持橐出入禁省之臣哉具官父某蚤以文藝
策名儒科廉平之政靜退之守有聞於時不克大施
委慶厥嗣司我內制甚文而賢惟時正奉之階視昔
貳卿之秩用均釐澤以示寵綏可

前母淑人陳氏贈淑人

故母陳氏同

勅士有砥節厲行修身於隱約之中而遺慶於數十
年之後其必有內助之賢相與保勤儉均甘苦以成
其室家故既久而弥大也具官某淑靖之美宗姻所
懷敬戒之宜君子是賴屬我均釐之澤肆盼綸綍之
褒雖稱謂之不殊亦寵嘉之有煒可

故妻淑人趙氏贈淑人

勅士方抱藝守約沉於下僚以保廉儉之操不以窮
達累其心者亦室家之助也及其安榮通顯而不與
焉則湛澤之施其可以後具官故妻薰陶賢範毓質
慶門淑御名之儀宜于姻族屬我云云下
詞同

妻淑人莊氏封淑人

勅二南之詩婦德是懋夫以鴉鳩均一之美螽斯衆
多之報俯仰無斁淑御名有聞豈非婦人之盛節而有
家之可願者哉具官妻毓質慶胄婉懿靜專克相厥
夫有茲休顯屬我云云下
詞同

貞節堂表氏鈔本

吏部侍郎黎確父任許田縣主簿國子監
直講贈朝議大夫宗孟贈中大夫

勅上詞同具官父蚤以經術掌教儒宮寬裕以文靖共
是蹈委慶厥嗣實貳天官惟茲五品之階往視儲宮
之友用均隆澤以示寵綏可

故母詞同汪母

故妻

勅士方抱藝守約困於未試而有以保其廉儉之操
者亦室家之助也其安榮云云下詞同汪故妻

妻詞同汪妻

吏部侍郎高衛父任左朝請郎尚書戶部
郎中鑄贈銀青光祿大夫

勅上詞同汪具官父蚤以才猷進陟華省靖共是蹈風績
故存不克大施委慶厥嗣惟時二品之位視昔六宮
之聯用示寵綏以均釐澤可

故前母普安郡夫人趙氏贈淮安郡夫人
故母齊安郡夫人趙氏贈同安郡夫人詞

同

勅上詞同汪倫綽之褒疏大郡以易封增寵章之有煒可
故妻令人李氏贈碩人

貞節堂袁氏鈔本

勅侍從宣力之臣有以才術自奮出入膺任以底顯
榮至於耆艾而內助之賢不與享焉則湛澤之施其
可後哉具官妻婉嫕之質鍾自慶門云云同汪故妻之褒惟恩
綽之薦加賁寵章之有煒可

兵部尚書胡直孺父任職方郎中贈開府
儀同三司况贈少保

勅上詞同汪父具官父蚤以儒科周旋膺任靖共樂愷藏器
郎曹不克大施委慶厥嗣位我常伯為時老成惟茲
保傳之聯是謂孤卿之列用均釐澤以示寵綏可

故母詞同汪

故繼母嘉國夫人龔氏贈徐國夫人 詞同
故妻淑人呂氏贈淑人

龍圖閣待制知廣州林適父任建州司理
叅軍贈中大夫格贈太中大夫

勅上詞具官父蚤以廉平服勤州掾義方之教行於
家庭不克大施委慶厥嗣職在延閣出帥巨藩惟茲
五品之階往視七人之列用均釐澤以示寵綏可

故母令人陳氏贈碩人

妻令人范氏贈碩人

工部侍郎韓肖胄父中大夫贈正奉大夫

貞節堂表氏鈔本

治贈光祿大夫

勅上詞具官父盛德之後克承厥家端雅靖共亦濟
其美中更間退公議益孚不克大施委慶厥嗣惟崇
資之二品視疇昔之六卿用示寵綏以均釐澤可

故母碩人文氏贈和義郡夫人

勅在仁祖時輔相之賢有若彥博弼亮三世實為帝
師既已勤勞王家以安社稷矣其餘澤遺範刑于厥
家者蓋可知焉具官故母婉孌之質鍾自慶門淑靖
之儀宜于姻族乃有令子為我從臣屬敷錫於寰區
用宣恩於綸綍進封一等表以嘉稱以示寵章抑光

彤史可

繼母太碩人文氏贈齊安郡夫人詞同前

故妻令人王氏贈碩人詞同汪

故妻令人文氏贈碩人詞同

呂好問父任奉直大夫直祕閣贈太子少

師希哲贈太子太傅

勅詞同汪而况職在祕殿嘗更鈞轄之任者哉具官父

某盛德遺範鍾於其聲純粹靖共見於行已中更黨

論公望益明不克大施委慶厥嗣惟儲宮之峻秩有

訓導之古官均彼師嚴升之二品用敷釐澤益示寵

貞節堂表氏鈔本

綏可

故母齊安郡夫人張氏贈文安郡夫人

勅士有砥節厲行修身於奧窔之間遺慶於數十年

之後其必有內助之賢相與守廉勤之操保平康之

福以成其室家故既久而弥大也具官故母詞同前

故妻永嘉郡夫人王氏贈東萊郡夫人

勅輔弼之臣有以才德自奮以底顯榮至於耆老五

福成備而內助之賢不與享焉則湛澤之施其可後

哉具官故妻詞同前

給事中洪擬明堂大禮封贈

父贈通議大夫固贈通奉大夫

勅朕肇修宗祀祇見合宮釐事既成肆敷錫於四海
凡通籍于朝者皆得寵贈其先俾申追遠之志而况
吾簪筆持橐出入禁省之臣哉具官父某種德在躬
委慶厥嗣歷踐高顯甚賢而文惟時三品之階視昔
貳卿之秩用均釐澤以示寵綏可

妻宜人鄧氏封令人

勅二南之詩婦德是懋夫以鵲鳩均一之美螽斯衆
多之報俯仰無斁淑御名有聞豈非婦人之盛節而有
家之可願者哉具官婉懿之美宜其宗姻克相厥夫

貞節堂表氏鈔本

有茲休願屬我均釐之澤肆盼綸綍之褒易以嘉稱
時為寵命可

戶部尚書孟庾故父贈朝散大夫贈中奉

大夫

勅上詞具官種德在躬委慶厥嗣司我邦計實吾信
臣惟時三品之階視昔貳卿之列用均釐澤以示寵
綏可

故母宜人申氏贈淑人

勅上詞如綍之褒易以嘉稱時惟寵命

妻宜人徐氏封淑人

資政殿大學士中大夫提舉萬壽宮兼侍
緇故祖任尚書都官郎中贈太子少傅克
存贈太子少師

勅朕爰以季秋肇稱禋祀貴誠上質備匏尊橐席之
儀創業守文嚴藝祖太宗之配既成釐事用渙渥恩
舉茲在服之臣與蒙追遠之責矧予舊學頃贊洪鈞
加寵厥先理其可後具官故祖某蓄德深厚藏器恢
宏炳文藝以決科藹循良之令聞馮唐老於郎省曾
無不過之嗟予公大其門閭固有將興之兆惟春宮
之峻秩設六傅以備官莫如師嚴以視公貳用加榮

貞節堂袁氏鈔本

於褒錫以增寵於幽潛可

故祖母平原郡夫人韓氏贈

勅朕惟祖宗以來慶賜之典每下未嘗不追賁廷臣
之世者豈徒廣孝道於天下抑以為積善之勸焉具
官故祖母克以淑德相其君子周旋撫仕通籍金閨
生享錫封沒有加贈而高門之澤大於厥孫為時醇
儒實我舊學肆朕展合宮之饗推四海之恩用申出
綍之褒以廣均釐之霈易封大郡增賁九原豈唯慰
烝嘗之思抑以表慶祥之遠可

故祖母安化郡夫人皇甫氏贈饒陽郡夫

人

勅朕祇祀上穹均釐四海追遠之數下及於庶僚而况輔政之舊稽古之儒加寵其先盖有彝典具官故祖母令儀懿範禮法具宜嬪于德人慶流厥後致位休顯為時老成頃進服於大僚既加恩於三世逮茲慶賜益示寵綏申之大郡以疏封易以饒陽之美稱時惟新命用賁有家可

故祖母臨淮郡夫人來氏贈淮安郡夫人

勅朕觀載籍之傳考興衰之緒其流澤後世俾衣冠之盛忠厚之風益隆而不墜者非獨世德之修而已

貞節堂表氏鈔本

盖有閨壺之助焉具官故祖母禮法是蹈淑靖在躬化行於閨門仁及於宗戚以有茲慶迄成厥家肆予展窆於合宮爰始均釐於緜宇矧繫舊學嘗贊國鈞加寵其先盖有彝典是用疏淮安之大郡易泗上之故封時惟新恩歆我休命可

故父任宣教郎贈太子少師發贈太子

太保

勅官無大小惠足以及物者其澤必長天無私親位弗稱其德者其償必厚惟善祥之不爽知義教之有方顧茲褒贈之彝章是亦報施之明驗具官故父某

育德寬裕提身肅恭適承詩禮之規無愧循良之吏云云

故母高平郡夫人張氏贈太寧郡夫人

勅揚名顯親蓋人子之至願而聖人以為孝道之終者也其有作配君子允宜其家有子而賢為國近弼既荐蒙於寵數可無與於均隆乎具官故母徽懿之儀見於內則慈祥之行成此慶門雖五鼎千鐘不逮南陔之養而清臺石窀式慰寒泉之思比疏錫於高平固益彰於休顯太寧大郡用易故封賜加綸綍之榮以為慶善之勸可

故妻淄川郡夫人高氏贈濟陽夫人

貞節堂袁氏鈔本

勅先王制禮與夫推恩接下之文未嘗不本於人情也夫相其夫於勤約之中既已躬廉儉而同甘苦矣而不共享其安榮則追贈之隆抑以慰其私尔具官故妻賢淑有聞宜其閨門嬪於大家安若素習天闕不壽褒賁可忘既疏錫於淄川復進封於大郡時惟新命歆此寵休可

妻永嘉郡夫人強氏封同安郡夫人

勅二南之詩本於王化之基而及於夫人之德雖形四方風一國小大不同然其所以循法度奉承嘗致輔佐之宜一也具官妻婉嫕之儀明淑之美克配君

子宜其宗姻至于耆艾有此休顯既更大郡之錫載
易同安之封以示寵榮用均釐澤可

北山小集卷第二十三

貞節堂袁氏鈔本

北山小集卷第二十四

信安程俱

外制三

吏部員外郎胡世將校書郎劉一止除監

察御史 九月二十八日

勅具官御史臺屬皆朕耳目之官也自元豐肇新官
制於是尚書諸曹分隸六察雖非言責之地然尚書
萬機本天下之事無不總焉而御史得以糾六曹之
愆違則其任亦不輕矣以尔問學之美推於輩流才
術之敏見於已試召對便殿敷奏可觀維持朝綱肆

以命尔其祇厥職尚有寵嘉可云云推於輩流已上詞同
才術之施宜無不可選自讎校維持朝綱尚體懋恩
益祇厥職可

文林郎河南府孟汝唐州鎮撫使司幹辦
公事任直清與改合入官除直祕閣仍賜

緋章服

九月二十八日

勅具官尔以諸生奮身戎幕百舍重趼入奏行朝賜
對從容有嘉忠恪官以寄祿實視京僚蓬萊道山以
儲英俊併用示寵錫以身章求之異時非聲譽在人
服勤之久保任應格功效卓然者未有一朝而兼得

貞節堂袁氏鈔本

者也朕之寵尔者厚矣尔亦思所以報之可

叅知政事李回除資政殿學士江南西路

安撫大使令謝辭上殿

十月二日

勅宣力四方必有股肱之賴折衝千里是資帷幄之
良朕念江西之上游有若豫章之臣鎮民亦勞止豈
無還定安集之思我儀圖之爰得禮樂詩書之帥具
官才足以經遠學足以贊猷蚤獻納於朝端亦緝熙
於王度靜而能應剛而有容迺者扈長樂之遐征總
行臺之庶務暨還吳會陟副樞庭遂佐國鈞益資展
告屬懇辭於機政方圖任於蕃宣用升祕殿之華仍

付中權之重惟廟堂之宿望固應深體於焦勞惟荆楚之舊臨諒已周知於利病往蘇疲瘵式副倚毗行尔所聞豈煩多訓可

武節大夫河南府孟汝唐州鎮撫使翟興
武功大夫遙郡防禦使

勅具官朕遭時艱虞東狩吳會顧瞻舊都永懷創守未嘗不中夜以興當饋而歎也尔奮自校長不忘國恩獨以貔虎之師屢挫奚虜之氣輯綏民族祇奉寢園遂定洛京益張武衛朕甚嘉之進階三等以旌尔功仍陟兵防俾持使節是皆超躡宜體睠知尔其

貞節堂表氏鈔本

益屬於忠勤朕亦無愛於爵祿騰聲懋績豈不躋哉可

給事中洪擬除吏部尚書

勅天官掌六典以佐王是為周制吏部建九品以取士始大魏邦惟今古之異宜在倚毗而鈞重求諸近列吾得其人具官學問之優見於從政靖兵之美儀於本朝夙將使指於四方亦既敷宣於德教周歷憲臺之三院固多啓沃於聰謀比自司言進膺平奏屬銓量之虛位思振舉於頽綱念非老成莫克付授矧自文籍散逸吏緣為姦真偽混淆官益以冗至於法

出而詐起安得風流而令行惟通簡如裴王則足以
應無窮之緒惟清明如崔范則足以祛積弊之源諒
亦優為佇觀成績可

汪藻龍圖閣直學士知湖州

勅澗河之西列郡惟八吳興當苕霅之會適繁簡之
中在於平時最為樂土昨者虜寇大入跳梁郡疆縣
當厥衝鮮不震蕩然則禦備安集蓋難其人具官輟
自禁苑則吾信臣况淹練古今於從政乎何有而敷
陳利病每誠心乎愛民諒堅及物之心益觀儒者之
効雖鞅掌諷議若中外之或殊然鍼石拊摩實又安
之是賴休戚所繫往其欽哉可

黎確龍圖閣待制知漳州

勅七閩南粵之交有漳浦焉其地儉陋故其民窶以
嗇其為郡僻左故吏至則鄙夷其人是以澤不下宣
而民益困非里社不遠因俗制宜鮮克稱治具官輟
自侍從則吾信臣

云云下
詞同汪

高衛龍圖閣待制知撫州

勅迺者虜騎大入蹂吾江西臨川之民蕩析厥居罔
或生聚朕思得敏惠之士往而勞來還定安集之庶
幾補創痍之酷息愁歎之聲有以召和而弭亂也具

官輟自侍從則吾信臣况嘗將命於外臺固已淹通於政事且復階榮於近著所宜深體於焦勞諒於綏馭之間益展忠勤之効雖尔身在外若遠邇之或殊然國步方艱亦承宣之是賴休戚所繫往其欽哉可

左司員外郎趙子晝太常少卿

勅具官太常禮樂之司自天下多故文籍散亡猝有討論莫之折中儀曹博士口呿而不能對掌故客吏意行而無所稽朕甚閔焉以尔學問該通操履修潔試之宰士裨益則多擢貳曲臺時惟高選夫裒文籍於散亡之後明禮樂於缺壞之餘唯其勉哉時尔之

貞節堂表氏鈔本

任可

刑部員外郎錢稔大理少卿

勅具官廷尉天下之平得其人則天下無冤民不得其平則民將無所措手足然則為之貳者其可不量其任哉以尔比以才選為郎尚書持節餉軍轉輸不匱風力之敏於此可觀士制祥刑往為之佐尚其忱恪以答寵休可

降授朝奉大夫姚舜明左司郎官吏部員

外郎仇愈右司員外郎

勅具官尚書萬幾本而聯治分職允釐於六官處中

經體則任之大臣舉綱引墨則責之宰士不有彌綸
之助孰承斟酌之宜以尔舜明中外荐更頗著風績
以尔愈比叅銓叙克守厥官矧皆俊造之升是資儒
雅之飾尚其祗恪以副簡求可

潘良貴考功郎官樓炤兵部李易屯田張
杓刑部張滙比部郎官

勅具官六卿之屬不同其於贊喉舌之司成攷會之
務者顧豈有異哉以尔良貴自信不回頃更言路以
尔炤綽有才辯慷慨事功以尔易發策行朝先鳴多
士以尔杓該通律令號為祥明以尔滙為吏有稱濟

貞節堂表氏鈔本

以強敏或翱翔於已試或激昂於有為俾列位於文
昌庶效能於司會惟時遴簡無曠厥官可

孟庾除叅知政事

勅朕丕承基緒思濟艱難無競惟人方急賢能之舉
不懈於位寧忘豈弟之宜俾入贊於國均庶有孚於
輿望具官忱誠許國才業應辰宣力四方更外臺之
賦政元戎十乘司留鑰於陪京益既乃心咸有成績
遂升華於延閣旋分職於司徒肆予肇祀之成繫尔
豐財之助涉明斯在方鳴玉以造庭經體是宜用出
綸而敷命方今國勢未振民力既疲共惟置器之安

以佐涉川之濟唯德稱而又厥辟毋面從而後言
卜式膺二府之求蓋朴忠之是賴劉晏輔中興之業
亦食貨之周知尚奮尔庸以起予治可

中奉大夫龍圖閣待制知撫州高衛磨勘

轉中大夫

勅三載考績三考黜陟幽明故任土作貢之功必成
於四考之後而績用弗成之罰亦九載而後加焉此
唐虞黜陟之明驗也後世遷徙既數考課之法不行
侍從之官率三載而進秩徒以夙夜之勞而已具官
宣力中外才猷既孚方自銓曹出守大郡舉有司之

貞節堂表氏鈔本

典加四品之崇資是亦新恩往其祗服可

直龍圖閣前知婺州傅崧卿除秘書少監
勅具官承平之初肇建三館凡文學論思之選鮮不
出於其間官制既行歸之秘省為之貳者未嘗輕以
畀人以尔賓貢春闈蔚為俊造之首周旋朝著雅有
端諒之稱進思多憂國之言出使有愛民之志召自
近郡對於宴間俾侍蘭臺益懋遠業時惟遴簡其往
欽哉可

吏部負外郎廖剛起居舍人

勅具官自史官之職不修而言動之記隨以略濶仗

下之後吁俞謀議不得聞焉設官之意蓋自唐室而失之然非行藝有聞不以充選以尔操履端諒學問優深有猷有為名實既加於士類矣簪筆殿陛亦吾從臣罔非正人則有古訓承弼乃辟惟尔之休往其欽哉祇其新命可

陸長民孫近吏部郎官王珩戶部郎官胡

蒙度支郎官

勅具官等中臺六官實總天下之務而吏戶二曹最為浩繁得其人則銓叙平而財用理不得其人則事不治而受其敝者衆故異時常以通簡敏達之士為

貞節堂文集鈔本

之屬以尔長民儒雅潤飾見於踐揚以尔近詞學策名嘗更治郡以尔珩政事不苟以尔蒙疆濟有聞或繇俊造之升或著廉平之効文昌之選尤重於今惟是名曹是任加劇時惟新命尚其懋哉可

龍圖閣學士朝議大夫致仕翟汝文翰林

學士

勅朕惟唐室中微出狩于外時則有帷幄之傑不二心之臣如陸贄者通達國經彌縫袞闕克入厥辟迄成恢復之功朕未嘗不想見其人也具官瑰璋之文藻飾王度邁往之氣高視士林出則藩宣之良入為

侍從之長茲用舊物還之禁塗豈惟資潤色之工感
人心而孚朕意庶幾有論思之賴竭忠節以贊中興
其景行於昔賢以欽承於休命可

朝奉郎徽猷閣待制知婺州李光尚書吏
部侍郎主管右選

勅古者源清而官省故以尚書總銓衡近世法具而
負多則分四選為左右自兵車之為衛巡方岳以在
行文牘寔亡防範隨缺思舉浩繁之治必資通簡之
才具官勁挺得於天姿學術明於治理抗憤世疾邪
之論有捐軀徇國之心久均逸以就閒盍共思於丕

貞節堂袁氏鈔本

濟俾贊天官之職益觀邦治之成惟去敝戢姦若尔
之為守令則政修事舉予不謬於簡知往其欽哉懋
乃攸績可

李彌大尚書吏部侍郎主管左選

勅上詞同具官問學該通器質渾厚自艱難而多故每
慷慨以奮忠均逸殊庭荐更歲律盍共思於丕濟庶
益展於嘉猷俾貳天官以贊邦治苟吏屬知戢姦而
遠罪則尔為無負於簡求若官曹皆宣力而建功則
朕亦何憂於不理欽予時命尚其懋哉可

王氏封和義夫人

勅王氏朕方每食嘗膽未明求衣固無逸豫之思與夫聲色之奉儻服勤於夙夜亦宜示於寵嘉以尔婉嫕自待温恭是蹈屬備貫魚之列爰叅祀燕之儀顧小心而弗違疏大郡以加錫尚其祗恪以稱渥恩可

掌衣蘇氏典寶宋氏典綵

勅掌衣蘇氏等朕即位以來時巡方岳掖庭之屬屢簡僅存其有躬夙夜之勞居掌事之列理宜加秩用示寵陞以尔恪名御無違服勤寢久進之八品寶綵是供時為懋思益祗乃事可

河東轉運判官直祕閣王寔贈正議大夫

貞節堂表氏鈔本

勅舉褒贈之典卹死事之孤所以勸忠勞之臣而致仁厚之意也具官頃以才選轉漕河東而奚虜之衆長圍太原身與帥臣嬰城固守王略不澹卒為賊圍將軍生降方安右校之位少從前死不隨屬國之歸而妻子自言流離之狀朕盡然傷之進官七等視昔貳卿且推恩其子孫抑加勸於遐邇服此嘉寵尚其有知可

瑞昌縣玉仙鄉稅戶迪功郎周仁厚與改

承務郎

勅具官廼者淮右之寇跳梁江西命將臣俊以所部

致討焉汝能以私儲詣軍自獻食以不匱亦與有勞
寄祿初階是為京秩益務報稱服我恩休可

王庶轉兩官除徽猷閣直學士

勅自奚虜大入暴師中原六年于茲矣而戡定之功
未云獲也其有分綏御之權制閫外之事而能所歷
有紀威聲隱然至於夷險不回績効尤著則陟明之
典其可後乎具官忠蓋出於天姿才猷見於累試蚤
被器使投刃之下無全牛比屬時危疾風而後知勁
草爰更帥路屢奏膚公載撫興元有嘉豫備樞臣來
諗功狀卓然豈唯寬朕北顧之憂抑以張吾犄角之

貞節堂表氏鈔本

勢延閣之邃學士之班是為清華以旌功伐仍進官
之二等亦示勸於一時益懋乃庸以稱休寵可

朝奉大夫直祕閣趙開除直顯謨閣

勅具官師行川陝于今三年矣所以禦敵者在兵而
所以聚兵者在食至於權貨殖以資軍實則又不可
以乏共者焉以尔奮自諸生果於立事付之才計才
効沛然樞臣奏功進官一等升華延閣併示寵嘉尚
其勉之以暢榮問可

吳玠明州觀察使

勅朕以經理二陝付之樞臣奉將天威武遏亂略非

有熊羆之士不二心之臣相與勦力盡忠內撫外禦
則戡定之期未可以歲月冀也膚公來上懋賞是宜
具官才氣不羣忠勇自奮策足功名之會騰聲關隴
之間比者擢帥涇原盡護諸將岐下之戰尤為雋功
獲其酋豪醜類折北是用疇其多捷涉以廉車夫雄
職美官朕所以待功能之士也益奮尔烈朕無愛焉
可

明州觀察使吳玠起復前件官職差遣

勅考移於忠者聖人之格言爾忘家者人臣之彝
憲而况分閫外之寄統諸路之師淬厲以湏枕戈待

貞節堂表氏鈔本

旦而可以親喪廢乎具官比以功伐寢階顯榮却敵
有沉果之機馭軍適威愛之濟戰多中率懋賞既行
遽深風木之悲方從金草之事矧臨敵忘於易將而
軍制容於奪情其安厥常毋曠尔職苟能揚名於世
以顯其父母則忠孝之道兩得矣尔其懋哉可

胡唐老賜謚

勅母將陳定陶之議號稱安國之言丙吉饗博陽之
封兼收不伐之美其有一時造膝世莫得聞五載不
言死而後顯易名之典非朕尔私具官俊造策名儒
雅飾吏莪冠憲府居有匪躬之思剖符侯邦綽著于

城之節顧惟京口實控吳疆疇其已試之功付之連
帥之任俄屬隣邦失守大將移軍空城莫嬰散卒橫
潰方身叩城壘示以招徠之不疑而盜憎主人何虞
禍變之忽起素志不遂朕甚傷之比因同產之抗章
具列靖康之關說節惠之請下之有司舉安民大慮
之言與在國逢難之故合是二法責於九原庶英爽
之有知亦僉輿之無間可

德安府復州漢陽軍鎮撫使陳規除徽猷
閣待制

勅朕以安復漢陽三郡之衆設為巨屏命守臣持節

貞節堂表氏鈔本

鎮撫之所以保人民奮武衛也乃能內輯外禦軍聲
隱然懋賞之行理其可後具官才猷見於已試惠智
資於自然屢嬰賊鋒卒固城守勞來安集荆襄之民
實賴焉夫待制西清是為法從肆以命尔以旌尔功
且身在侯藩職在延閣則朕腹心之臣也勉建功業
朕不汝忘可

德安府通判李忬直祕閣

勅具官圖書之府上應奎躔祖宗以來用儲英俊有
職於此率時聞人用以勸功則為異數以尔能以才
力佐治一邦屢嬰賊鋒卒固城守清華之選以示寵

綏尚其欽哉益思報稱可

故中書侍郎贈開府儀同三司張慤謚惠

穆

勅士方逢時力或可致國有公是死而益明褒善貶惡則存諸太史之書考行易名則付之禮官之議是謂彝典誰其敢私具官以強濟之才持公忠之志蚤更器使懋著廉平之稱晚事潛藩益展勤勞之節旋登政地俾贊國均發言無華每懷盡瘁以紓患特立不懼弗為姑息以市恩人望頓隆朝僉惟允不淑之歎遽沒於元身無數之思尚孚於輿議屬邇臣之有

貞節堂表氏鈔本

請繫節惠以加褒惟慮國以忘家與布德而執我合是二法責於九原庶幾英爽之歆抑為忠蓋之勸可

謝文瓘贈徽猷閣待制與兩資恩澤

勅上詞同
楊康國

思有優恤具官熙寧之間以經術登上第靖

國之歲以學行備從官獻可稽疑議論持正遭罹讒毀流落喪亡公論既明寵嘉可後待制延閣時惟渥恩且推澤於子孫庶少伸於抑厭可

吏部尚書洪擬除龍圖閣待制知温州

勅法從之臣

云云上詞同
汪藻與郡

具官肅括而濟之以和明察

而行之以恕輟自常伯則吾信臣况淹練古今與從

政乎何有而講明治道每誠心乎愛民顧永嘉之保
疆實浙東之名郡惟西清之延閣有河圖之舊班雖
鞅掌諷議若中外之或殊然鍼石拊摩實又安之是
賴尚體睠任益懋尔庸可


謝克家差知泉州

勅朕惟甌閩之區實居嶺海之會督府之外泉為大
邦四方游寓之所棲百貨懋遷之自出頃者盜發旁
鄉士民震驚師出淹時調度繁廣顧艱危之未息豈
安集之可稽苟非重臣孰任憂寄具官文學政事儀
于朝端寬裕疏通達於治體比擢叅於大政方允賴

貞節堂表氏鈔本

於嘉猷遽陳辭劇之章且申均逸之請重違雅志俾
侍殊庭屬深軫於遐方因即勤於卧治昔白傅退居
於西洛亦就拜於尹釐若畢公身在於東郊尚無忘
於入告朕命不易往其欽哉可

北山小集卷第二十四



貞節堂袁氏鈔本

貞節堂

